

---

M. TULLII CICERONIS  
DE  
FINIBVS BONORVM  
ET MALORVM  
AD  
B R V T V M  
LIBER II.

---

Hic cum uterque me intueretur, seque  
ad audiendum significant paratos: Primum,<sup>I</sup>  
inquam, deprecor, ne me, tanquam philo-  
sophum, putetis scholam vobis aliquam ex-  
plicaturum; quod ne in ipsis quidem philo-  
sophis magnopere unquam probavi. Quando  
enim Socrates, qui parens philosophiæ jure  
dici potest, quidquam talefecit? Eorum erat  
iste mos, qui tum sophistæ nominabantur;  
quorum e numero primus est ausus Leonti-  
nus Gorgias in conventu poscere quæstio-  
nem, id est jubere dicere, qua de re quis  
vellet audire. Audax negotium; dicerem

## 184 DE FINIB. BONOR. ET MALOR.

impudens, nisi hoc institutum postea translatum ad philosophos nostros esset. Sed & illum, quem nominavi, & ceteros sophistas, ut e Platone intelligi potest, lusos videmus a Socrate. is enim percontando atque interrogando elicere solebat eorum opiniones, quibuscum differebat, ut ad ea, quæ ii respondissent, si quid videretur, diceret. qui mos cum a posterioribus non esset retentus, Arcefilas eum revocavit; instituitque, ut ii, qui se audire vellent, non de se quærerent, sed ipsi dicerent, quid sentirent. quod cum dixissent, ille contra. sed qui audiebant, quoad poterant, defendebant sententiam suam. Apud ceteros autem philosophos, qui quæsivit aliquid, tacet. quod quidem jam sit etiam in Academia. Ubi enim is, qui audire vult, ita dixit, *voluptas mihi videtur esse summum bonum*; perpetua oratione contra disputatur: ut facile intelligi possit, eos, qui aliquid sibi videri dicant, non ipfos in ea sententia esse, sed audire velle contraria. 3 Nos commodius agimus. non enim solum Torquatus dixit, quid sentiret, sed etiam cur: ego autem arbitror, quamquam admidum delectatus sum ejus oratione perpetua, tamen commodius, cum in rebus singulis

insistas, & intelligas, quid quisque concedat, quid abnuat, ex rebus concessis concludi, quod velis, & ad exitum perveniri. Cum enim fertur, quasi torrens, oratio, quamvis multa cujusque modi rapiat; nihil tamen tenetas, nihil apprehendas, nusquam orationem rapidam coerceas.

Omnis autem in quærendo, quæ via quidem & ratione habetur oratio, præscribere primum debet, ut quibusdam in formulis, *Ea res agitur*, ut, inter quos differitur, conveniat, quid sit id, de quo differatur. Hoc positum in Phædro a Platone probavit 2 Epicurus; sensitque, in omni disputatione id 4 fieri oportere. sed quod proximum fuit, non vidit. negat enim definiri rem placere: sine quo fieri interdum non potest, ut inter eos, qui ambigunt, conveniat, quid sit id, de quo agatur; velut in hoc ipso, de quo nunc disputamus. Quærimus enim finem bonorum: possumusne scire, hoc quale sit, nisi contulerimus inter nos, cum finem bonorum dixerimus, quid finis, quid etiam sit ipsum bonum? Atqui hæc patefactio quasi rerum 5 opertarum, cum quid quidque sit aperitur, definitio est; qua tu etiam imprudens utebare nonnunquam, nam hunc ipsum sive fl-

nem, sive extremum, sive ultimum definiebas, id esse, quo omnia, quæ recte fierent, referrentur, neque id ipsum usquam referretur. Praeclare hoc quidem. Bonum ipsum etiam quid esset, fortasse, si opus fuisset, definitiss; aut, quod esset natura appetendum: aut, quod prodefferset: aut, quod juvaret: aut, quod liberet modo. Idem (nisi molestum est) quoniam tibi non omnino displicet definire, & id facis cum vis; velim definias, quid sit voluptas; de quo omnis hæc quæstio est.

**6** Quasi quis, inquit, sit, qui, quid sit voluptas, nesciat; aut qui, quo magis id intelligat, definitionem aliquam desideret. Me ipsum esse dicerem, inquam, nisi mihi viderer habere bene cognitam voluptatem, & satis firme conceptam animo atque comprehensam. nunc autem dico, ipsum Epicurum nescire, & in eo nutare; cumque, qui crebro dicat, diligenter oportere exprimi, quæ vis subiecta sit vocibus, non intelligere interdum, quid sonet hæc vox voluptatis, [id est, quæ res huic voci subjiciatur]. Tunc ille ridens,

**3** Hoc yero, inquit, optimum, ut is, qui finem rerum expetendarum voluptatem esse dicat, id ext̄remum, id ultimum bonorum; id ipsum, quid sit, quale sit, nesciat. Atqui,

inquam, aut Epicurus, quid si voluptas, aut omnes mortales, qui ubique sunt, nesciunt. Quoniam, inquit, modo? Quia voluptatem hanc esse sentiunt **omnes**, quam sensus accipiens novetur, & jucunditate quadam profunditur. Quid ergo, istam voluptatem, inquit, Epicurus ignorat? Non semper, inquam. nam interdum nimis etiam novit, quippe qui testificetur, ne intelligere quidem se posse ubi sit, aut quid sit ullum bonum, praeter illud, quod cibo, & potionē, & aurium delectatione, & obscena voluptate capiatur. An hæc ab eo non dicuntur? Quasi vero me pudeat, inquit, istorum, aut non possim, quemadmodum ea dicantur, ostendere. Ego vero non dubito, inquam, quin facile possis: nec est, quod te pudeat sapienti asseriri; qui se unus, quod sciam, sapientem profiteri sit ausus. nam Metrodorum non putant ipsum professum; sed, cum appellaretur ab Epicuro, repudiare tantum beneficium noluisse. Septem autem illi, non suo, sed populorum suffragio omnium, nominati sunt. Verum hoc loco sumo, verbis his eandem certe vim voluptatis Epicurum nosse, quam ceteros. omnes enim jucundum motum, quo sensus hilaretur, Græce ηδονην,

Latine voluptatem vocant. Quid est igitur, inquit, quod requiras? Dicam, inquam, & quidem discendi causa magis, quam quo te, aut Epicurum reprehensum velim. Ego quoque, inquit, didicerim libentius, si quid attuleris, quam te reprehenderim. Tenesne igitur, inquam, Hieronymus Rhodius quod dicat esse summum bonum, quo putet omnia referri oportere? Teneo, inquit, finem illi videri, nihil dolere. Quid? idem iste de voluptate quid sentit? Negat esse eam, inquit, propter seipsum expetendam. Aliud igitur esse censet gaudere, aliud non dolere. Et quidem, inquit, vehementer errat. nam, ut paulo ante docui, augendae voluptatis finis est, doloris omnis amotio. Non dolere, inquam, istud quam vim habeat, postea videro: aliam vero vim voluptatis esse, aliam nihil dolendi, nisi valde pertinax fueris, concedas necesse est. Atqui reperies, inquit, in hoc quidem pertinacem. dici enim nihil potest verius. Estne quæso, inquam, sitienti in bibendo voluptas? Quis istud, inquit, posset negare? Eademne, inquam, quæ restincta siti? Immo alio genere. restincta enim sitis stabilitatem voluptatis habet, inquit: illa autem voluptas ipsius restinctionis in mo-

tu est. Cur igitur, inquam, res tam dissimiles eodem nomine appellas? Quid paulo <sup>10</sup> ante, inquit, dixerim; nonne meministi, cum omnis dolor detractus esset, variari, non augeri voluptatem? Memini vero, inquam. sed tu istuc dixisti bene Latine, parum plane. varietas enim Latinum verbum est, idque proprie quidem in disparibus coloribus dicitur; sed transfertur in multa dispergia. varium poema, varia oratio, varii mores, varia fortuna, voluptas etiam varia dici solet, cum percipitur ex multis dissimilibus rebus, dissimiles efficientibus voluptates. Eam si varietatem diceres, intelligerem, ut, etiam non dicente te, intelligo. ista varietas quæ sit, non satis perspicio, quod ait, cum dolere careamus, tum in summa voluptate nos esse; cum autem vescamur iis rebus, quæ dulcem motum afferant sensibus, tum esse in motu voluptatem, qui faciat varietatem voluptatum; sed non augeri illam non dolendi voluptatem. quam cur voluptatem appelles, nescio. An potest, inquit ille, quidquam esse suavius, quam nihil dolere? Immo <sup>4</sup> <sup>11</sup> fit sane nihil melius, inquam (nondum enim id quero) num propterea idem voluptas est, quod (ut ita dicam) indolentia? Plane idem,

## 190 DE FINIB. BONOR. ET MALOR.

inquit, & maxima quidem, qua fieri nulla major potest. Quid dubitas igitur, inquam, summo bono a te ita constituto, ut id totum in non dolendo sit, id tenere unum, id tueri, id defendere? quid enim necesse est, tanquam meretricem in matronarum coetum, sic voluptatem in virtutum concilium adducere? invidiosum nomen est, infame, suspectum. Itaque hoc frequenter dici solet a vobis, non intelligere nos, quam dicat Epicurus voluptatem. Quod quidem mihi si quando dictum est: est autem dictum non parum saepe: etsi satis clemens sum in disputando, tamen interdum soleo subirasci. Ego non intelligo, quid sit ἡδονὴ Græce, Latine voluptas? utram tandem linguam nescio? deinde, qui fit, ut ego nesciam, sciant omnes, quicunque Epicurei esse voluerunt? quod vestri quidem vel optime disputant, nihil opus esse, eum, qui philosophus futurus fit, sciare literas. Itaque, ut majores nostri ab aratro abduxerunt Cincinnatum illum, ut dictator esset; sic vos de Pelasgis omnibus colligitis bonosillos quidem viros, sed certe non pereruditos. Ergo illi intelligunt, quid Epicurus dicat, ego non intelligo? Ut scias me intelligere, primum idem esse voluptatem di-

co, quod ille ἡδονὴ. & quidem sæpe quærimus verbum Latinum par Græco, & quod idem valeat; hic nihil fuit, quod quæreremus. Nullum iveniri potest, quod magis idem declaret Latine, quod Græce ἡδονὴ, quam declarat voluptas. Huic verbo omnes, qui ubique sunt, qui Latine sciunt, duas res subjiciunt, lætitiam in animo, commotionem suavem jucunditatis in corpore. Nam & ille apud Trabeam, volaptatem animi nimiam, laetitiam dicit, eandem, quam ille Cæcilianus, qui *omnibus laetitiis laetum esse* se narrat. Sed hoc interest, quod voluptas dicitur etiam in animo; vitiosa res, ut Stoici putant, qui eam sic definiunt: *Sublationem animi sine ratione, opinantis se magno bono frui*: non dicitur lætitia, nec gaudium in corpore. in eo autem voluptas, omnium Latinæ loquentium more, ponitur, cum percipitur ea, quæ sensum aliquem moveat, jucunditas. hanc quoque jucunditatem, si vis, transfer in animum: *juvare enim in utroque dicitur, ex eoque jucundum*; modo intelligas, inter illum, qui dicat,

*Tanta laetitia audius sum, ut mihi non  
contem;*

& eum, qui,

*Nunc demum mihi animus ardet ;  
quorum alter lætitia gestiat, alter dolore cru-  
cietur; esse illum medium ,*

*Quamquam haec inter nos nuper notitia  
admodum est ,*

*qui nec lætetur, nec angatur: itemque in-  
ter eum, qui potiatur expeditis corporis vo-  
luptatibus, & eum, qui crucietur summis  
doloribus, esse eum, qui utroque careat.*

5 Satisne igitur videor vim verborum tenere; an sum etiam nunc vel Græce loqui, vel La-  
tine docendus? Et tamen vide, ne, si ego  
non intelligam, quid Epicurus loquatur, cum  
Græce, ut videor, luculenter sciam; sit ali-  
qua culpa ejus, qui ita loquatur, ut non in-  
telligatur. quod duobus modis sine reprehen-  
sione fit: si aut de industria facias, ut Hera-  
clitus, cognomento qui σοφεύς perhibetur,  
quia de natura nimis obscure memoravit;  
aut cum rerum obscuritas, non verborum,  
facit, ut non intelligatur oratio; qualis est  
in Timæo Platonis. Epicurus autem, ut  
opinor, nec non vult, si possit, plane &  
aperte loqui: nec de re obscura, ut physici;  
aut artificiosa, ut mathematici; sed de illu-  
stri & facilis, etiam in vulgus pervagata, lo-  
quitur. Quamquam non negatis nos intelli-  
gere,

gere, quid sit voluptas, sed quid ille dicat.  
e quo efficitur, non ut nos non intelligamus,  
quæ vis sit istius verbi, sed ut ille suo mo-  
re loquatur, nostrum negligat. Si enim<sup>16</sup>  
idem dicit, quod Hieronymus, qui censet  
summum bonum esse, sine ulla molestia vi-  
vere; cur mavult dicere voluptatem, quam  
vacuitatem doloris, ut ille facit, qui, quid  
dicat, intelligit? Sin autem voluptatem pu-  
tat adjungendam eam, quæ sit in motu: (sic  
enim appellat hanc dulcem, *in motu*; illam  
nihil dolentis, *in stabilitate*:) quid tendit,  
cum efficere non possit, ut cuiquam, qui  
ipse notus sibi sit, hoc est, qui suam natu-  
ram sensumque perspexerit, vacuitas doloris  
& voluptas idem esse videatur? Hoc est vim  
afferre, Torquate, sensibus: extorquere ex  
animis cognitiones verborum, quibus imbuti  
sumus. Quis enim est, qui non videat,  
hæc esse in natura rerum tria? unum, cum  
in voluptate sumus; alterum, cum in dolo-  
re; tertium hoc, in quo nunc quidem sumus?  
Credo idem vos nec in dolore, nec in volu-  
ptate esse: ut in voluptate sit, qui epuletur;  
in dolore, qui torqueatur. Tu autem inter  
hæc tantam multitudinem hominum interje-  
ctam non vides, nec lætantium, nec dolen-

17 tium? Non prorsus, inquit: omnesque, qui sine dolore sint, in voluptate, & ea quidem summa, esse dico. Ergo in eadem voluptate eum, qui alteri misceat mulsum, ipse non fitiens, & eum, qui illud sitionis bibat?

6 Tum ille, Finem, inquit, interrogandi, si videtur: quod quidem ego a principio ita me malle dixeram, hoc ipsum providens, dialecticas captiones. Rhetorice igitur, inquam, nos mavis, quam dialectice disputare? Quasi vero, inquit, perpetua oratio rhetorum solum, non etiam philosophorum sit. Zenonis est, inquam, hoc Stoici, omnem vim loquendi, ut jam ante Aristoteles, in duas tributam esse partes: rhetoricam palmaræ, dialecticam pugno similem esse dicebat, quod latius loquerentur rhetores, dialectici autem compressius. Obsequar igitur voluntati tuæ: dicamque, si potero, rhetorice, sed hac rhetorica philosophorum, non nostra illa forensi; quam necesse est, cum populariter loquatur, esse interdum paulo hebetior rem. Sed dum dialecticam, Torquate, contemnit Epicurus, quæ una continet omnem & perspiciendi, quid in quaue re sit, scientiam, & judicandi, quale quidque sit, & ratione ac via disputandi; ruit in dicendo, ut

mihi quidem videtur, nec ea, quæ docere  
vult, ulla arte distinguit; ut hæc ipsa, quæ  
modo loquebamur. Summum a vobis bo-  
num voluptas dicitur. Aperiendum est igitur,  
quid sit voluptas; aliter enim explicari, quod  
quæritur, non potest. quam si explicavisset,  
non tam hæsitaret. Aut enim eam volunta-  
tem tueretur, quam Aristippus, id est, qua  
sensus dulciter ac jucunde movetur: quam  
etiam pecudes, si loqui possent, appellarent  
voluptatem: aut, si magis placeret suo more  
loqui, quam

*Omnes Danai Mycenenses, Attica pubes,*  
reliquique Græci, qui hoc anapaesto citan-  
tur, hoc, non dolere, solum voluptatis no-  
mine appellaret, illud Aristippeum contem-  
neret: aut, si utrumque probaret, ut pro-  
bat, conjungeret doloris vacuitatem cum  
voluptate, & duabus ultimis uteretur. Mul- 19  
ti enim, & magni philosophi hæc ultima bo-  
norum juncta fecerunt, ut Aristoteles, qui  
virtutis usum cum vitæ perfectæ prosperita-  
te conjunxit. Callipho adjunxit ad honesta-  
tem voluptatem: Diodorus ad eandem hone-  
statem addidit vacuitatem doloris. Idem fe-  
cisset Epicurus, si sententiam hanc, quæ  
nunc Hieronymi est, conjunxisset cum Ari-

Aristippi vetere sententia. Illi enim inter se dis-  
sentient; propterea singulis finibus utuntur  
&, cum uterque egregie Græce loquatur;  
nec Aristippus, qui voluptatem summum bo-  
num dicit, in voluptate ponit non dolere,  
neque Hieronymus, qui summum bonum  
statuit non dolere, voluptatis nomine unquam  
utitur pro illa indolentia; quippe qui ne in  
expetendis quidem rebus numeret volunta-  
tem. Duæ sunt enim res quoque, ne tu ver-  
ba solum putes. unum est, sine dolore esse;  
alterum cum voluptate. Vos ex his tam dis-  
similibus rebus non modo nomen unum (nam  
id facilius paterer) sed etiam rem unam ex  
duabus facere conamini; quod fieri nullo  
modo potest. Hic, qui utramque probat,  
ambobus debuit uti, sicut facit re, neque  
tamen dividit verbis. cum enim eam ipsam  
voluptatem, quam eodem nomine omnes ap-  
pellamus, laudat locis plurimis, audet dice-  
re, ne suspicari quidem se ullum bonum se-  
junctum ab illo Aristippeo genere voluptatis;  
atque ibi hoc dicit, ubi omnis ejus est oratio  
de summo bono. In alio vero libro, in quo  
breviter comprehensis gravissimis sententiis,  
quasi oracula edidisse sapientiæ dicitur, scri-  
bit his verbis: quæ nota tibi profecto, Tor-

quate, sunt. Quis enim vestrum non edidicit Epicuri *νυπλας δόξας*, id est, quasi maxime ratas, quia gravissimæ sint ad beate vivendum breviter enuntiatæ sententiæ? Animadverte igitur, rectene hanc sententiam interpreter. Si ea, quae sunt luxuriosis efficien-  
tia voluptatum, liberarent eos deorum, &  
mortis, & doloris metu, docerentque, qui es-  
sent fines cupiditatum; nihil haberemus, quod  
reprehenderemus: cum undique complerentur  
voluptatibus, nec haberent ulla ex parte aliquid  
aut dolens, aut aegrum, id est, aut malum.

Hoc loco se tenere Triarius non potuit. Obscro, inquit, Torquate, hæc dicit Epicurus? quod mihi quidem vitus est, cum sciret, velle tamen confidentem audire Torquatum. At ille non pertimuit, saneque si-  
denter, Iстis quidem ipsis verbis, inquit: sed quid sentiat, non videtis. Si alia sentit, in-  
quam, alia loquitur; nunquam intelligam,  
quid sentiat; sed plane dicit, quod intelligam.  
idque si ita dicit, non esse reprehendendos  
luxuriosos, si sapientes sint, dicit absurdum; si-  
militer & si dicat, non reprehendendos par-  
ricidas, si nec cupidi sint, nec deos metuant,  
nec mortem, nec dolorem. Et tamen, quid  
attinet luxuriosis ullam exceptionem dare,

aut fingere aliquos, qui, cum luxuriose viverent, a summo philosopho non reprehenderentur eo nomine, duntaxat cetera caveant? Sed tamen nonne reprehenderes, Epicure, luxuriosos ob eam ipsam causam, quod ita viverent, ut persequerentur cujusque modi voluptates; cum esset præsertim, ut ait, summa voluptas nihil dolere? Atqui reperiemus asotos primum ita non religiosos, ut edant de patella: deinde ita mortem non timentes, ut illud in ore habeant ex Hymnide,

*Mihi sex menses satis sunt vitae: septimum Orco spondeo.*

Jam doloris medicamenta illa Epicurea, tanquam de nartheclo promant: *Si gravis, brevis: si longus, levis.* unum nescio, quo modo possit, si luxuriosus sit, finitas cupiditates habere. Quid ergo attinet dicere, *Nihil haberem, quod reprehenderem, si finitas cupiditates haberent?* hoc est dicere, *non reprehenderem asotos, si non essent asoti.* isto modo, ne improbos quidem, si essent boni viri. Hic homo severus luxuriam per se ipsam reprehendendam non putat. & hercule, Torquate, ut verum loquamur, si voluptas summum bonum est, rectissime non putat:

nolim enim mihi fingere asotos, ut soletis,  
qui in mensam vomant, & qui de conviviis  
auferantur, crudique postridie se rursus in-  
gurgitent: qui solem, ut ajunt, nec occi-  
denter unquam viderint, nec orientem: qui,  
consumitis patrimoniis, egeant: nemo no-  
strum istius generis asotos jucunde putat vi-  
vere. Mundos, elegantes, optimis cocis, pi-  
storibus, piscatu, aucupio, venatione, his  
omnibus exquisitis, vitantes cruditatem; qui-  
bus vinum defusum e pleno sit; hir, siphon,  
ut ait Lucilius, cui nihil demsit; nix & sac-  
culus abstulerit nil: adhibentes ludos, & quæ  
sequuntur illa; quibus detractis, clamat Epi-  
curus se nescire, quid sit bonum: adsint etiam  
formosi pueri, qui ministrent: respondeat  
his vestis, argentum, Corinthium, locus  
ipse, aedificium. Hos ego asotos bene qui- 24  
dem vivere, aut beate nunquam dixerim. ex  
quo efficitur, non ut voluptas ne sit volu-  
ptas, sed ut voluptas non sit summum bo-  
num. Nec ille, qui Diogenem Stoicum ado-  
lescens, post autem Panaetium audierat,  
Laelius, eo dictus est sapiens, quod non in-  
telligeret, quid suavissimum esset: (nec enim  
sequitur, ut cui cor sapiat, ei non sapiat pa-  
latum) sed quia parvi id duceret.

200 DE FINIB. BONOR. ET MALOR.

*O lapathe, ut jactare necesse est, cognitu'  
cui sis.*

*In quo Laelius' clamores sophos ille solebat  
Edere, compellans gurnias ex ordine no-  
stros.*

**Praeclare Laelius, & recte sophos, illudque  
vere:**

*O Publi, o gurges, Galloni, es homo  
miser, inquit:*

*Coenasti in vita nunquam bene, cum omnia  
in ista*

*Consumis squilla, atque acipensere cum  
decumano.*

Is hæc loquitur, qui in voluptate nihil po-  
nens, negat eum bene coenare, qui omnia  
ponat in voluptate; & tamen non negat li-  
benter unquam coenasse Gallonium (menti-  
retur enim) sed bene. Ita graviter & seve-  
re voluptatem secernit a bono. ex quo illud  
efficitur, qui bene coenent, omnes libenter  
coenare; qui libenter, non continuo bene.

23 semper Laelius bene. Quid bene? dicet Lu-  
cilius, *costo, condito. sed cedo caput coenae:*  
*sermone bono. quid ex eo? si quaeri', libenter.*  
veniebat enim ad coenam, ut animo quieto  
fatiaret desideria naturæ. Recte ergo is ne-  
gat, unquam bene coenasse Gallonium; re-

ste, miserum: cum præsertim in eo omne studium consumeret; quem libenter coenasse nemo negat. Cur igitur non bene? Quia quod bene, id recte, frugaliter, honeste: ille porro, male, prave, nequiter, turpiter coenabat. Non igitur nec lapathi suavitatem acipensi Gallonii Laelius anteponebat, sed suavitatem ipsam negligebat. quod non faceret, si in voluptate summum bonum poneret. Semovenda est igitur voluptas, non solum ut facta sequamini, sed etiam ut loqui deceat<sup>26</sup> frugaliter. Possimusne igitur in vita summum bonum dicere, cum id ne in coena quidem posse videatur?

Quo modo autem philosophus loquitur tria genera cupiditatum? naturales & necessarias: naturales, non necessarias: nec naturales, nec necessarias? Primum divisit ineleganter. duo enim genera quæ erant, fecit tria. hoc est non dividere, sed frangere rem. qui si diceret cupiditatum esse duo genera, naturales & inanes: naturalium quoque item duo, necessarias & non necessarias; confecta res esset. qui hæc didicerunt, quæ ille contemnit, sic solent. vitiosum est enim in dividendo, partem in genere numerare. Sed<sup>27</sup> hoc sane concedamus, contemnit enim diffe-

rendi elegantiam: confuse loquitur. gerendus est mos, modo recte sentiat. Et quidem illud ipsum non nimium probo (& tamen patior) philosophum loqui de cupiditatibus finiendis. An potest cupiditas finiri? tollenda est atque extrahenda radicitus. Quis est enim, in quo sit cupiditas, quin recte cupidus dici possit? Ergo & avarus erit, sed finite: & adulter, verum habebit modum: & luxuriosus eodem modo, Qualis ista philosophia est, quæ non interitum afferat pravitatis, sed sit contenta mediocritate vitiorum? quamquam in hac divisione rem ipsam prorsus probo; elegantiam desidero. appellet hæc desideria naturæ: cupiditatis nomen servet alio, ut, cum de avaritia, cum de intemperantia, cum de maximis vitiis loquetur, 28 eam tanquam capit is accuset. Sed hæc quidem liberius ab eo dicuntur & sèpius; quod equidem non reprehendo. est enim tanti philosophi tamque nobilis, audacter sua decreta defendere.

Sed tamen ex eo, quod eam voluptatem (quam omnes gentes hoc nomine appellant) videtur amplexari sèpe vehementius, in magnis interdum versatur angustiis, ut, hominum conscientia remota, nihil tam turpe

sit, quod voluptatis causa non videatur esse facturus. deinde, ubi erubuit (vis enim est permagna naturæ) confugit illuc, ut neget accedere quidquam posse ad voluptatem nihil dolentis. At iste non dolendi status non vocatur voluptas. Non labore, inquit, de nomine. Quid, quod res alia tota est? Reperiā multos, vel innumerabiles potius, non tam curiosos, nec tam molestos, quam vos estis; quibus, quidquid velim, facile persuadeam. Quid ergo dubitamus, quin, 29 si non dolere voluptas sit summa, non esse in voluptate, dolor sit maximus? cur id non ita sit? Quia dolori non voluptas contraria est, sed doloris privatio. Hoc vero non videre, maximo arguento est, esse voluptatem illam; qua sublata, neget se intelligere omnino, quid sit bonum. eam autem ita persequitur, quæ palato percipiatur, quæ auribus: cetera addit, quæ si appelles, honos præfandus sit. Hoc igitur, quod solum bonum severus & gravis philosophus novit, idem non videt ne expetendum quidem esse, quod eam voluptatem hoc eodem auctore non desideremus, cum dolore careamus. Quam hæc sunt contraria! Hic si definire, 30 vel dividere didicisset, si loquendi vim, si

denique consuetudinem verborum teneret, nunquam in tantas salebras incidisset. nunc vides, quid faciat. quam nemo unquam voluptatem appellavit, & hanc in motu voluptatem, quæ duo sunt, unum facit. sic enim has suaves & quasi dulces voluptates appellat. interdum ita extenuat, ut M'. Curium putes loqui: interdum ita laudat, ut, quid præterea sit bonum, neget sed posse ne suspicari quidem. quæ jam oratio non a philosopho aliquo, sed a censore opprimenda est. non est enim vitium in oratione solum, sed etiam in moribus. luxuriam non reprehendit, modo sit vacua infinita cupiditate & timore. Hoc loco discipulos quærere videtur, ut, qui asoti esse velint, philosophi antefiant.

A primo, ut opinor, animantium ortu petitur origo summi boni. Simul atque natum animal est, gaudet voluptate, & eam appetit, ut bonum; aspernatur dolorem, ut malum. De malis autem & bonis, ab iis animalibus, quæ nondum depravata sint, ait optime judicari. Hæc & tu ita posuisti, & verba vestra sunt. Quam multa vitiosa? summum enim bonum & malum vagiens puer ultra voluptate dijudicabit, stante, an mo-

vente? quoniam, si diis placet, ab Epicuro  
loqui discimus. Si stante, hoc natura videli-  
cet vult, salvam esse se, quod concedimus:  
si movente, quod tamen dicitis, nulla turpis  
voluptas erit, quæ prætermittenda sit. & si-  
mul non proficiscitur animal illud modo na-  
tum a summa voluptate; quæ est a te posita  
in non dolendo. Nec tamen argumentum 32  
hoc Epicurus a parvis petivit, aut etiam a  
bestiis, quæ putat esse specula naturæ, ut  
diceret, ab his, duce natura, hanc volu-  
ptatem expeti nihil dolendi. Neque enim hæc  
movere potest appetitum animi: nec ullum  
habet ictum, quo pellat animum status hic  
non dolendi. itaque in hoc eodem peccat  
Hieronymus. At ille pellit, qui permulcet  
sensum voluptate. itaque Epicurus semper  
hoc utitur, ut probet voluptatem natura  
expeti; quod ea voluptas, quæ in motu sit,  
& parvos ad se alliciat & bestias; non illa  
stabilis, in qua tantum 33  
ineft nihil dolere.  
Qui igitur convenit, ab alia voluptate dice-  
re naturam proficisci, in alia summum bo-  
num ponere? Bestiarum vero nullum judi- II  
cium puto. quamvis enim depravatæ non  
sint, pravæ tamen esse possunt. Ut bacillum  
aliud est inflexum & incurvatum de indu-

stria, aliud ita natum: sic ferarum natura non est illa quidem depravata mala disciplina, sed natura sua. Nec vero, ut voluptatem expetat, natura movet infantem; sed tantum ut se ipse diligit, ut integrum se salvumque velit. Omne enim animal, simul ut ortum est, & seipsum & omnes partes suas diligit; duasque, quæ maximæ sunt, in primis amplectitur, animum & corpus; deinde utriusque partes. Nam sunt & in animo præcipua quædam, & in corpore; quæ cum leviter agnovit, tunc discernere incipit, ut ea, quæ prima data sunt natura, appetat,  
34 asperneturque contraria. In his primis naturalibus voluptas insit, nec ne, magna quæstio est. nihil vero putare esse, præter voluptatem, non membra, non sensus, non ingenii motum, non integratatem corporis, non valetudinem, summæ mihi videtur inscitiae. Atque ab isto capite fluere neceesse est omnem rationem bonorum & malorum. Polemoni, etiam ante Aristoteli, ea prima visa sunt, quæ paulo ante dixi. Ergo nata est sententia veterum Academicorum & Peripateticorum, ut finem bonorum dicentes, secundum naturam vivere, id est, virtute adhibita, frui primis a natura datis. Calli-

pho ad virtutem nihil adjunxit, nisi voluptatem: Diodorus, nisi vacuitatem doloris. His omnibus, quos dixi, consequentes sunt fines bonorum. Aristippo simplex voluptas: Stoicis, consentire naturæ; quod esse volunt e virtute, id est, honeste vivere: quod ita interpretantur, vivere cum intelligentia earum rerum, quæ natura evenirent, eligentem ea, quæ essent secundum naturam, rejicientemque contraria. Ita tres sunt fines expertes 35 honestatis, unus Aristippi vel Epicuri; alter Hieronymi; Carneadis tertius: tres, in quibus honestas cum aliqua accessione, Polemonis, Calliphonis, Diodori. una simplex, cuius Zeno auctor, posita in decore tota, id est, in honestate. nam Pyrrho, Aristo, Herillus jam diu abjecti. reliqui sibi constituerunt, ut extrema cum initii convenirent; ut Aristippo voluptas, Hieronymo doloris vacuitas, Carneadi frui principiis naturalibus, 12 esset extrellum. Epicurus autem cum in prima commendatione voluptatem dixisset; si eam, quam Aristippus, idem tenere debuit ultimum bonorum, quod ille: si eam, quam Hieronymus, fecisset idem, ut voluptatem illam, non Aristippi, in prima commendatione poneret.

36 Nam, quod ait, sensibus ipsis judicari, voluptatem bonum esse; dolorem malum: plus tribuit sensibus, quam nobis leges permittunt. privataram litium judices sumus. nihil enim possumus judicare, nisi quod est nostri judicii. in quo frustra judices solent, cum sententiam pronuntiant, addere, *Si quid mei judicii est.* Si enim non fuit eorum judicii, nihilo magis, hoc non addito, illud est judicatum. Quid judicatur sensibus? dulce, amarum: lene, asperum: prope, longe: stare, movere: quadratum, rotundum.

37 Quam igitur pronuntiabit sententiam ratio? Adhibita primum divinarum humana-rumque rerum scientia, quæ potest appellari rite sapientia; deinde adjunctis virtutibus, quas ratio rerum omnium dominas, tu voluptatum satellites & ministras esse voluisti; quarum adeo omnium sententia pronuntiabit, primum de voluptate, nihil esse ei loci, non modo ut sola ponatur in summi boni sede, quam quærimus, sed ne illo quidem modo, ut ad honestatem applicetur. De vacuitate doloris eadem sententia erit. Rejicietur enim Carneades: nec ulla de summo bono ratio aut voluptatis, non dolendive particeps, aut honestatis expers, probabitur. Ita relinquet duas,

duas, de quibus etiam atque etiam consideret. Aut enim statuet, nihil esse bonum, nisi honestum; nihil malum, nisi turpe: cetera aut omnino nihil habere momenti, aut tantum, ut nec expetenda, nec fugienda, sed eligenda modo aut rejicienda sint: aut anteponet eam, quam cum honestate ornatissimam, tum etiam ipsis initiis naturae & totius perfectione vitae locupletatam videbit. quod eo liquidius faciet, si perspicerit, rerum inter eas verborumne sit controversia.

Hujus ego nunc auctoritatem sequens I3  
idem faciam. quantum enim potero, minuam 39  
contentiones; omnesque simplices sententias  
eorum, in quibus nulla ineft virtutis adjun-  
ctio, omnino a philosophia removendas pu-  
tabo: primum Aristippi, Cyrenaicorumque  
omnium; quos non est veritum, in ea volu-  
ptate, quae maxime dulcedine sensum move-  
ret, summum bonum ponere, contemnentes  
istam vacuitatem doloris. Hi non viderunt, ut 40  
ad cursum equum, ad arandum bovem, ad in-  
dagandum canem; sic hominem ad duas res,  
ut ait Aristoteles, ad intelligendum & ad agen-  
dum esse natum, quasi mortalem deum: con-  
traque, ut tardam aliquam & languidam

210 DE FINIB. BONOR. ET MALOR.

41 pecudem, ad pastum & ad procreandi voluptatem, sic hoc divinum animal ortum esse voluerunt. quo nihil mihi videtur absurdius. Atque hæc contra Aristippum, qui eam voluptatem non modo summam, sed solam etiam ducit; quam omnes unam appellamus voluptatem. Aliter autem vobis placet. Sed ille, ut dixi, vitiose. nec enim figura corporis, nec ratio excellens ingenii humani significat, ad hanc unam rem natum hominem, ut frueretur voluptatibus. Nec vero audiendus Hieronymus; cui sumum bonum est idem, quod vos interdum, vel potius nimium sœpe dicitis, nihil dolere. non enim, si malum dolor est, carere eo malo satis est ad bene vivendum. Hoc dixerit potius Ennius:

*Nimium boni est, cui nihil est mali.*

Nos beatam vitam non depulsione mali, sed adeptione boni judicemus: nec eam cessando, sive gaudentem, ut Aristippus, sive non dolentem, ut hic; sed agendo aliquid, con-  
42 siderandove quæramus. Quæ possunt eadem contra Carneadeum illud summum bonum dici, quod is non tam, ut probaret, protulit, quam ut Stoicis, quibuscum bellum gerebat, opponeret. Id autem ejusmo-

di est, ut additum ad virtutem, auctoritatem videatur habiturum. & expleturum cumulato vitam beatam; de quo omnis hæc quæstio est. Nam qui ad virtutem adjungunt vel voluptatem, quam unam virtus minimi facit; vel vacuitatem doloris, quæ etiam si malo caret, tamen non est summum bonum; accessione utuntur non ita probabili, nec tamen, cur id tam parce, tamque restrictive faciant, intelligo. Quasi enim emendum eis sit, quod addant ad virtutem, primum vilissimas res addunt: deinde singulas potius, quam omnia quæ prima natura approbavisset, [ea cum voluptate conjungent.] Quæ cum Aristoni & Pyrrhoni omnino visa sunt pro nihilo, ut inter optime 43 valere & gravissime ægrotare, nihil prorsus dicerent interesse, recte jam pridem contra eos desitum est disputari. Dum enim in una virtute sic omnia esse voluerunt, ut eam rerum selectione exspoliarent, nec ei quidquam, aut unde oriatur, darent, aut ubi niteretur; virtutem ipsam, quam amplexabantur, sustulerunt. Herillus autem ad scientiam omnia revocans, unum quoddam bonum vidit; sed nec optimum, nec quo vita gubernari possit, itaque hic ipse jam pridem

est rejectus. post enim Chrysippum non sa-  
**I4** ne est disputatum. Restatis igitur vos. nam  
cum Academicis incerta luctatio est; qui  
nihil affirmant, &, quasi desperata cognitio-  
ne certi, id sequi volunt, quodcunque veri-  
**44** simile videatur. Cum Epicuro autem hoc  
est plus negotii, quod e duplice genere vo-  
luptatis conjunctus est; quodque & ipse, &  
amici ejus, & multi postea defensores ejus  
sententiae fuerunt: & nescio, quomodo is,  
qui auctoritatem minimam habet, maximam  
vim, populus cum illis facit. quos nisi ar-  
guimus, omnis virtus, omne decus, omnis  
vera laus deserenda est. Ita ceterorum sen-  
tentiis semotis, relinquitur non mihi cum  
Torquato, sed virtuti cum voluptate certa-  
tio: quam quidem certationem, homo &  
acutus & diligens, Chrysippus, non contem-  
nit, totumque discrimen summi boni in ea-  
dem comparatione positum putat. Ego au-  
tem existimo, si honestum aliquid ostendero,  
quod sit ipsum vi sua propter seque expe-  
tendum, jacere vestra omnia. Itaque eo, qua-  
le sit breviter, ut tempus postulat, constitu-  
to, accedam ad omnia tua, Torquate; nisi  
memoria forte defecerit.

**45** Honestum igitur id intelligimus, quod

tale est, ut detracta omni utilitate, sine ullis præmiis fructibusque, per se ipsum possit jure laudari. quod quale sit, non tam definitione, qua sum usus, intelligi potest, (quamquam aliquantum potest,) quam communis omnium iudicio, & optimi cuiusque studiis atque factis; qui permulta ob eam unam causam faciunt, quia decet, quia rectum, quia honestum est; et si nullum consecuturum emolumen<sup>m</sup> vident. Homines enim, et si aliis multis, tamen hoc uno a bestiis plurimum differunt, quod rationem habeant a natura datam, mentemque & acrem, & vigentem, celerrimeque multa simul agitantem, &, ut ita dicam, sagacem: quæ & causas rerum, & consecutiones videat, & similitudines transferat, & disjuncta conjungat, & cum præsentibus futura copulet, omnemque complectatur vitæ consequentis statum. Eademque ratio fecit hominem hominum appetentem, cumque his natura, & sermone, & usu congruentem, ut profectus a caritate domesticorum ac suorum serpat longius, & se implicit primum civium, deinde omnium mortalium societate: atque, ut ad Archytam scripsit Plato, non sibi se soli natum meminerit, sed patriae, sed suis, ut

46 perexigua pars ipsi relinquatur. Et quoniam eadem natura cupiditatem ingenuit homini veri inveniendi, quod facilissime apparet, cum vacui curis, etiam quid in cœlo fiat, scire avemus: his initis inducti omnia vera diligimus, id est, fidelia, simplicia, constantia: tum vana, falsa, fallentia odimus, ut fraudem, perjurium, malitiam, injuriam. Eadem ratio habet in se quiddam amplum atque magnificum, ad imperandum magis, quam ad parendum accommodatum: omnia humana non tolerabilia solum, sed etiam levia ducens: altum quiddam & excelsum, nihil timens, nemini cedens, semper invictum. Atque his tribus generibus honestorum notatis, quartum sequitur, & in eadem pulchritudine, & aptum ex illis tribus; in quo ineptus ordo & moderatio cuius similitudine perspecta in formarum specie ac dignitate, transiit ad honestatem dictorum atque factorum. Nam ex his tribus laudibus, quas ante dixi, & temeritatem reformidat, & non audet cuiquam aut dicto protervo aut facto nocere; vereturque quidquam aut facere, aut loqui, quod parum virile videatur.

15 HABES UNDIQUE EXPLETAM & PERFECTAM,

Torquate, formam honestatis; quæ tota his 48  
quatuor virtutibus, quæ a te quoque com-  
memoratæ sunt, continetur. Hanc se tuus  
Epicurus omnino ignorare dicit, quam aut  
qualem esse v'elint, qui honestate summum  
bonum metiantur. si enim ad honestatem  
omnia referantur, neque in ea voluptatem  
dicant inesse; ait, eos inani voce sonare (his  
enim ipsis verbis utitur) neque intelligere,  
neque videre, sub hac voce honestatis quæ  
sit subjicienda sententia. Ut enim consuetu-  
do loquitur, id solum dicitur honestum,  
quod est populari fama glriosum: quod,  
inquit, quamquam voluptatibus quibusdam  
est saepe jucundius, tamen expetitur prepter  
voluptatem. Videsne quam sit magna dis- 49  
sensio? philosophus nobilis, a quo non so-  
lum Græcia & Italia, sed etiam omnis bar-  
baria commota est, honestum quid sit, si id  
non est in voluptate, negat se intelligere:  
nisi forte illud, quod multitudinis rumore  
laudetur. Ego autem hoc etiam turpe esse  
sæpe judico: &, si quando turpe non fit,  
tamen non esse non turpe, cum id a multi-  
tudine laudetur. quod si sit ipsum per se re-  
ctum atque laudabile, non ob eam causam  
tamen illud dici honestum esse, quia laude-

tur a multis, sed quia tale sit, ut (vel si ignorarent id homines, vel si obmutuissent) sua tamen pulchritudine esset specieque laudabile. Itaque idem natura virtus, cui obfisti non potest, dicit alio loco id, quod a te etiam paulo ante dictum est, non posse jucunde vivi, nisi etiam honeste. Quid nunc, **50** honeste, dicitur? idemne, quod jucunde? ergo ita, non posse honeste vivi, nisi honeste vivatur. an nisi populari fama? sine ea igitur jucunde negat posse vivi? Quid turpius, quam sapientis vitam ex insipientium sermone pendere? Quid ergo hoc loco intelligit honestum? certe nihil, nisi quod possit ipsum propter se jure laudari. Nam si propter voluptatem; quae est ista laus, quae possit e macello peti? Non is vir est, ut, cum honestatem eo loco habeat, ut sine ea jucunde neget posse vivi, illud honestum, quod populare sit, sentiat, & sine eo jucunde neget vivi posse; aut quidquam aliud honestum intelligat, nisi quod sit rectum, ipsumque per se, sua vi, sua sponte, sua natura **16** laudabile. Itaque, Torquate, cum diceres, **51** clamare Epicurum, non posse jucunde vivi, nisi honeste, & sapienter, & juste viveretur, tu ipse mihi gloriari videbare. Tanta vis ine-

rat in verbis, propter earum rerum, quæ significabantur his verbis, dignitatem, ut altior fieres, ut interdum insisteres; ut nos intuens, quasi testificare, laudari honestatem & justitiam aliquando ab Epicuro. Quam te decebat iis verbis uti, quibus si philosophi non uterentur, philosophia omnino non egeremus? Istorum enim verborum amore, quæ perraro appellantur ab Epicuro, sapientiæ, justitiæ, temperantiæ, præstantissimis ingeniis homines se ad philosophiæ studium contulerunt.

*Oculorum, inquit Plato, est in nobis sensus acerrimus: quibus sapientiam non cernimus. quam illa ardentes amores excitaret sui, si videretur! Cur tandem? an quod ita callida est, ut optime possit architectari voluptates? cur justitia laudatur? aut unde est hoc contritum vetustate proverbium? Quicum in tenebris. Hoc dictum in una re, latissime patet; ut in omnibus factis, re, non teste moveamur.*

Sunt enim levia & perinfirma, quæ dicebantur a te, cum animi conscientia improbos excruciali, tum etiam poenæ timore; qua aut afficiantur, aut semper sint in metu, ne afficiantur aliquando. Non oportet

timidum aut imbecillo animo fingi; non bonum illum virum, qui, quidquid fecerit, ipse se cruciet, omniaque formidet: sed omnia callide referentem ad utilitatem, acutum, versutum, veteratorem, facile ut excoigitet, quo modo occulte, sine teste, sine  
54 ullo conscientia fallat. An tu me de L. Tubulo putas dicere? qui, cum praetor quaestione inter sicarios exerceret, ita aperte cepit pecunias ob rem judicandam, ut anno proximo P. Scævola, tribunus plebis, ferret ad plebem, *Vellente de ea re quaeri*. quo plebiscito decreta a ienatu est consuli quaestio Cn. Cæpioni. Profectus in exsilio Tubulus statim, nec respondere ausus, erat enim  
17 res aperta. Non igitur de improbo, sed callide improbo quaerimus, (qualis Q. Pompejus in foedere Numantino infitiando fuit,) nec vero omnia timente, sed primum qui animi conscientiam non curet; quam scilicet comprimere nihil est negotii. Is enim, qui occultus & tectus dicitur, tantum absit, ut se indicet, perficiet etiam, ut dolere alterius improbe facto videatur: quid est  
55 enim aliud, esse versutum? Memini me adesse P. Sextilio Rufo, cum is ad amicos rem ita deferret, se esse heredem Q. Fadio Gal-

lo; cuius in testamento scriptum esset, se ab eo rogatum, ut omnis hereditas ad filiam perveniret. id Sextilius factum negabat. poterat autem impune. quis enim redargueret? nemo nostrum credebat; eratque verisimilis, hunc mentiri, cuius interesset, quam illum, qui id se rogasse scripsisset, quod debuisset rogare. Addebat etiam, se in legem Voconiam juratum contra eam facere non audere, nisi aliter amicis videretur. Adramus nos quidem adolescentes, sed & multi amplissimi viri; quorum nemo censuit plus filiae dandum, quam posset ad eam lege Voconia pervenire. Tenuit permagnam Sextilius hereditatem; unde, si secutus esset eorum sententiam, qui honesta & recta emolumentis omnibus & commodis anteponerent, ne nummum quidem unum attigisset. Num igitur eum postea censes anxio animo aut sollicito fuisse? Nihil minus: contraque, illa hereditate dives; ob eamque rem latus. magni enim aestimabat pecuniam, non modo non contra leges, sed etiam legibus partam: quae quidem vel cum periculo est quærenda vobis, est enim effectrix multarum & magnarum voluptatum. Ut igitur illis, qui, 56 recta & honesta quæ sunt, ea statuant per

se expetenda, adeunda sunt quævis pericula  
decoris honestatisque causa; sic vestris, qui  
omnia voluptate metiuntur, pericula adeun-  
da sunt; ut adipiscantur magnas voluptates.  
Si magna res, magna hereditas agetur, cum  
pecunia voluptates pariantur plurimæ, idem-  
que erit Epicuro vestro faciendum, si suum  
finem bonorum sequi volet, quod Scipioni,  
magna gloria proposita, si Annibalem in Afri-  
cam retraxisset. Itaque quantum adiit pe-  
riculorum? ad honestatem enim ille omnem  
conatum suum referebat, non ad volunta-  
tem. sic vester sapiens magno aliquo emo-  
lumento commotus, cum causa, si opus fue-  
rit, dimicabit. Occultum facinus esse po-  
tuerit; gaudebit. deprehensus, omnem pœ-  
nam contemnet. erit enim instructus ad  
mortem contemnendam, ad exsilium, ad ip-  
sum etiam dolorem. quem quidem vos, cum  
improbis pœnam proponitis, impatibilem fa-  
citis; cum sapientem semper boni plus ha-  
bere vultis, tolerabilem. Sed finge non so-  
lum callidum eum, qui aliquid improbe fa-  
ciat, verum etiam præpotentem: ut M. Cras-  
sus fuit, qui tamen solebat uti suo bono: ut  
hodie est noster Pompejus, cui recte facien-  
ti gratia est habenda; esse enim quamvis vel-

let justus, iniquus poterat impune. Quam multa vero injuste fieri possant, quæ nemo possit reprehendere? Si te amicus tuus mo- 58 riens rogaverit, ut hereditatem reddas suæ filiæ, nec usquam id scriperit, ut scripsit Fadius, nec cuiquam dixerit; quid facies? Tu quidem reddes: ipse Epicurus fortasse redderet: ut Sex. Peducæus, Sex. filius, is, qui hunc nostrum reliquit, effigiem & humanitatis & probitatis suæ filium, tum doctus, tum omnium vir optimus & justissimus, cum sciret nemo, eum rogatum a C. Plotio, equite Romano splendido, Nursino, ultro ad mulierem venit, eique nihil opinanti viri mandatum exposuit, hereditatemque reddidit. Sed ego ex te quæro, (quoniam idem tu certe fecisses,) nonne intelligis, eo majorem vim esse naturæ, quod ipsi vos, quia omnia ad vestrum commodum, &, ut ipsi dicitis, ad voluptatem referatis, tam en ea faciatis, e quibus appareat, non voluptatem vos, sed officium sequi? plusque rectam naturam, quam rationem pravam valere? Si scieris, inquit Carneades, aspi- 59 dem occulte latere uspiam, & velle aliquem imprudentem super eam assidere, cuius mors tibi emolumendum factura sit: improbe fe-

ceris, nisi monueris, ne affideat: sed in punc  
ne tamen; scisse enim te quis coarguere  
possit? Sed nimis multa. perspicuum est enim,  
nisi æquitas, fides, justitia proficiscantur a  
natura, & si omnia hæc ad utilitatem refe-  
rantur, virum bonum non posse reperiri:  
60 deque his rebus satis multa in nostris de  
Republica libris sunt dicta a Laelio. Trans-  
**I9** fer idem ad modestiam, vel temperantiam,  
quæ est moderatio cupiditatum, rationi obe-  
diens. Satisne ergo pudori consulat, si quis  
fine teste libidini pareat? an est aliquid per  
se ipsum flagitosum, etiam si nulla comite-  
tur infamia? Quid fortis viri? voluptatum-  
ne calculis subductis prælium ineunt, san-  
guinem pro patria profundunt; an quodam  
animi ardore atque impetu concitati? Utrum  
tandem censes, Torquate, Imperiosum il-  
lum, si nostra verba audiret, tuamne de se  
orationem libentius auditurum fuisse, an  
meam; cum ego dicerem, nihil eum fecisse  
sua causa, omniaque reipublicæ, tu contra  
nihil, nisi sua? Si vero id etiam explanare  
velles, apertiusque dices, nihil eum fe-  
cisse, nisi voluptatis causa, quo modo eum  
61 tandem laturum fuisse existimes? Esto: fe-  
cerit, si ita vis, Torquatus propter suas uti-

litates. (malo enim dicere, quam voluptates, in tanto præsertim viro:) num etiam ejus collega P. Decius, princeps in ea familia consulatus, cum se devovebat, & equo admisso in medium aciem Latinorum irruerat, aliquid de voluptatibus suis cogitabat? Nam ubi eam caperet, aut quando, cum sciret confessim esse moriendum, eamque mortem ardentiore studio peteret, quam Epicurus voluptatem petendam putat? quod quidem ejus factum nisi esset jure laudatum, non esset imitatus quarto consulatu suo filius: neque porro ex eo natus, cum Pyrrho bellum gerens, consul cecidisset in proelio, seque e continentis genere tertiam victimam reipublicæ præbuisset. Contineo me ab exemplis. Græcis hoc modicum est: Leonidas, Epaminondas, tres aliqui, aut quatuor. Ego, si nostros colligere cœpero, perficiam illud quidem, ut se virtuti tradat constringendam voluptas. sed dies me deficiet: &, ut A. Varius, qui est habitus judex durior, dicere confessori solebat, cum, datis testibus, alii tamen citarentur, Aut hoc testium satis est, aut nescio, quid satis sit; sic a me satis datum est testium. Quid enim? te ipsum, dignissimum majoribus tuis, voluptasne indu-

xit, ut adolescentulus eriperes P. Sallæ consulatum? quem cum ad patrem tuum retulisses fortissimum virum; qualis ille vel consul, vel civis cum semper, tum post consulatum fuit? quo quidem auctore nos ipsi eageſſimus, ut omnibus potius, quam ipsis nobis consuluerimus.

**63** At quam pulchre dicere videbare, cum ex altera parte ponebas cumulatum aliquem plurimis & maximis voluptatibus, nullo nec præsenti, nec futuro dolore; ex altera autem, cruciatibus maximis, toto corpore, nulla nec adjuncta, nec sperata voluptate; & quærebas, quis aut hoc miserior, aut superiore illo beatior fore? deinde concludebas, summum malum esse dolorem, summum bo-

**20** num voluptatem? L. Thorius Balbus fuit, Lanuvinus, quem meminisse tu non potes. Is ita vivebat, ut nulla tam exquisita posset inveniri voluptas, qua non abundaret. erat & cupidus voluptatum, & cuiusvis generis ejus intelligens, & copiosus: ita non superstiosus, ut illa plurima in sua patria sacrificia & fana contemneret: ita non timidus ad mortem, ut in acie sit ob rempublicam 64 interfactus. Cupiditates non Epicuri divisione finiebat, sed sua satietae, habebat tamen

men rationem valetudinis: utebatur iis exer-  
citationibus, ut ad coenam & esuriens &  
ficiens veniret: eo cibo, qui & suavissimus  
effet, & idem facillimus ad concoquendum:  
vino, & ad voluptatem, & ne noceret. ce-  
tera illa adhibebat, quibus demitis negat se  
Epicurus intelligere, quid sit bonum. Abe-  
rat omnis dolor: qui si adesset, nec molliter  
ferret; & tamen medicis plus, quam philo-  
sophis uteretur. color egregius, integra va-  
letudo, summa gratia, vita denique conferta  
voluptatum omnium varietate. Hunc vero 65  
beatum: ratio quidem vestra sic cogit. At  
ego, huic quem anteponam, non audeo di-  
cere: dicet pro me ipsa virtus; nec dubi-  
tabit isti vestro beato M. Regulum antepo-  
nere: quem quidem, cum sua voluntate, nul-  
la vi coactus, propter fidem, quam dederat  
hosti, ex patria Carthaginem revertisset, tum  
ipsum, cum vigiliis & fame cruciaretur, cla-  
mat virtus beatiorem fuisse, quam potan-  
tem in rosa Thorium. Bella magna gesse-  
rat; bis consul fuerat; triumpharat: nec  
tamen sua illa superiora, tam magna, ne-  
que tam præclara ducebat, quam illum ulti-  
mum casum, quem propter fidem, constan-  
tiamque suscepserat: qui nobis miserabilis

videtur audientibus, illi perpetenti erat voluptarius. Non enim hilaritate, nec lascivia, nec risu, aut joco, comite levitatis, sed saepe etiam tristes firmitate & constantia  
66 sunt beati. Stuprata per vim Lucretia a regis filio, testata cives, se ipsa interemit. Hic dolor populi Romani, duce & auctore Bruto, causa civitati libertatis fuit; ob ejusque mulieris memoriam primo anno & vir, & pater ejus, consul est factus. Tenuis L. Virginius, unusque de multis, sexagesimo anno post libertatem receptam, virginem filiam sua manu occidit, potius, quam ea App. Claudii libidini, qui tum erat summo in imperio, dederetur. Aut haec tibi, Torquate, sunt vituperanda, aut patrocinium voluptatis repudiandum. Quod autem patrocinium, aut quæ ista causa est voluptatis, quæ nec testes ullos e claris viris, nec laudatores poterit adhibere? Ut enim nos ex annalium monumentis testes excitamus eos, quorum omnis vita consumta est in laboribus glorioſis, qui voluptatis nomen audire non possent; sic in vestris disputationibus historia muta est. Nanquam audivi in Epicuri scho-  
la Lycurgum, Solonem, Miltiadem, Themistoclem, Epaminondam nominari; qui in ore

sunt ceterorum omnium philosophorum. Nunc  
vero, quoniam hæc nos etiam tractare cœ-  
pimus, suppeditabit nobis Atticus noster de  
thesauris suis, quos & quantos viros [ha-  
bere testimoniū sat est.] Nonne melius est de 68  
his aliquid, quam tantis voluminibus de  
Themista loqui? Sint ista Græcorum. quam-  
quam ab his philosophiam & omnes inge-  
nuas disciplinas habemus. sed tamen est ali-  
quid, quod nobis non liceat, liceat illis. Pu-  
gnant Stoici cum Peripateticis. alteri ne-  
gant quidquam esse bonum, nisi quod ho-  
nestum sit. alteri, plurimum se, & longe,  
longeque plurimum tribuere honestati, sed  
tamen & in corpore, & extra, esse quædam  
bona. Et certamen honestum, & disputa-  
tio splendida: omnis est enim de virtutis  
dignitate contentio. At cum tuis cum dis-  
feras, multa sunt audienda etiam de obsco-  
nis voluptatibus, de quibus ab Epicuro sæ-  
pissime dicitur. Non potes ergo ista tueri, 69  
Torquate, mihi crede, si te ipse, & tuas co-  
gitationes, & studia perspexeris: pudebit  
te, inquam, illius tabulæ, quam Cleanthes,  
sane commode, verbis pingere solebat. Ju-  
bebat eos, qui audiebant, secum ipsos co-  
gitare pictam in tabula Voluptatem, pul-

cherrimo vestitu & ornatu regali, in folio sedentem: præsto esse virtutes, ut ancillas, quæ nihil aliud agerent, nullum suum officium ducerent, nisi ut voluptati ministrarent, & eam tantum ad aurem admonearent, (si modo id pictura intelligi posset,) ut caveret, ne quid perficeret imprudens, quod offenderet animos hominum, aut quidquam, e quo oriaretur aliquis dolor. Nos quidem virtutes, sic natæ sumus, ut tibi serviremus; aliud negotii nihil habemus.

**22** At negat Epicurus (hoc enim vestrū lumen est) quemquam, qui honeste non vivat, jucunde posse vivere: quasi ego id curem, quid ille ajat, aut neget. Illud quæro, quid ei, qui in voluptate summum bonum ponat, consentaneum sit dicere. Quid affers, cur Thorius, cur Postumius, cur Chius, cur omnium horum magister, Orata, non jucundissime vixerit? Ipse negat, ut ante dixi, luxuriosorum vitam reprehendam, nisi plane fatui sint, id est, nisi aut cupiant, aut metuant. quarum ambarum rerum cum medicinam pollicetur, luxuriæ licentiam pollicetur. his enim rebus detraetis, negat se reperire in asotorum vita quod 71 reprehendat. Non igitur potestis, voluptate

omnia dirigentes, aut tueri, aut retinere virtutem. Nam nec vir bonus ac justus haberi debet, qui, ne malum habeat, abstinet se ab injuria. nosti credo illud:

*Nemo pius est, qui pietatem - - -*

Cave quidquam putas esse verius. nec enim, dum metuit, justus est; & certe, si metuere desiterit, non erit. Non metuet autem, sive celare poterit, sive opibus magnis, quidquid fecerit, obtinere; certeque malet existimari bonus vir, ut non sit, quam esse, ut non putetur. Ita, quod certissimum est, pro vera certaque justitia, simulationem nobis justitiae traditis; præcipitisque quodam modo, ut nostram stabilem conscientiam contemnamus, aliorum errantem opinionem aucepemur. Quæ dici eadem de ceteris virtutibus possunt; quarum omnium fundamenta vos in voluptate, tanquam in aqua, ponitis. Quid enim? fortemne possumus dicere eundem illum Torquatum? delector enim, quamquam te non possum, ut ais, corrumpere: delector, inquam, & familia vestra, & nomine. & hercule mihi vir optimus nostrique amantissimus, A. Torquatus, versatur ante oculos; cuius quantum studium & quam insigne fuerit erga me tem-

72

## 230 DE FINIB. BONOR. ET MALOR.

poribus illis, quæ nota sunt omnibus, scire  
necessæ est utrumque vestrum. quæ mihi ip-  
si, qui volo & esse & haberi gratus, grata  
non essent, nisi eum perspicere mea causa  
mihi amicum fuisse, non sua: nisi hoc di-  
cis, sua, quod interest omnium recte face-  
re. Si id dicis, vicimus. id enim volumus,  
id contendimus, ut officii fructus sit ipsum  
73 officium. Hoc ille tuus non vult, omnibus-  
que ex rebus voluptatem, quasi mercedem,  
exigit. sed ad illum redeo. Si voluptatis  
causa cum Gallo apud Anienem depugnavit  
provocatus, & ex ejus spoliis sibi & tor-  
quem & cognomen induit, ullam aliam ob-  
causam, nisi quod ei talia facta digna viro  
videbantur; fortè non puto. Jam si pu-  
dor, si modestia, si pudicitia, si, uno verbo,  
temperantia, poenæ aut infamiae metu coer-  
cebuntur, non sanctitate sua se tuebuntur;  
quo adulterium, quo stuprum, quo libido  
non se proripiet ac projiciet, aut occulta-  
tione proposita, aut impunitate, aut licen-  
tia?

74 Quid? illud, Torquate, quale tandem  
videtur? te isto nomine, ingenio, gloria, quæ  
facis, quæ cogitas, quæ contendis, quo re-  
feras, cuius rei causa perficere, quæ cona-

ris, velis, quod optimum denique in vita  
judices, non audere in conventu dicere? Quid  
enim mereri velis jam, cum magistratum inie-  
ris, & in concessionem adscenderis, (est enim  
tibi edicendum, quæ sis observaturus in ju-  
re dicendo: & fortasse etiam, si tibi erit vi-  
sum, aliquid de majoribus tuis, & de te ip-  
so dices, more majorum) quid merearis igi-  
tur, ut te dicas in eo magistratu omnia vo-  
luptatis causa facturum esse? teque nihil  
fecisse in vita, nisi voluptatis causa? An  
me, inquis, tam amentem putas, ut apud  
imperitos isto modo loquar? At tu eadem  
ista dic in judicio, aut, si coronam times, dic  
in senatu. nunquam facies. cur, nisi quod  
turpis est oratio? Mene ergo & Triarium,  
dignos existimas, apud quos turpiter loqua-  
re? Verum, esto. Verbum ipsum volunta- 23  
tis non habet dignitatem; nec nos fortasse 75.  
intelligimus. hoc enim identidem dicitis, non  
intelligere nos, voluptatem quam dicatis. rem  
videlicet difficultem & obscuram. Individua  
cum dicitis, & intermundia, quæ nec sunt  
ulla, nec possunt esse, intelligimus: volu-  
ptas, quæ passeribus nota est omnibus, a no-  
bis intelligi non potest? Quid, si efficio, ut  
fateare, me non modo, quid sit voluptas,

scire, (est enim jucundus motus in sensu,) sed etiam, quid eam tu velis esse? tu enim eam ipsam vis, quam modo ego dixi; & nomen imponis, in motu ut sit, & faciat aliquam varietatem: tum aliam quandam summam voluptatem, cui addi nihil possit; eam tum adefse, cum dolor omnis absit, eam-  
76 que stabilem appellas. Sit sane ista volu-  
ptas. dic in quovis conventu, te omnia fa-  
cere, ne doleas. si ne hoc quidem satis am-  
ple, satis honeste dici putas; dic te omnia  
& in isto magistratu, & in omni vita, uti-  
litatis tuæ causa facturum, nihil nisi quod  
expedit, nihil denique nisi tua causa: quem  
clamorem concionis, aut quam spem consu-  
latus ejus, qui tibi paratissimus est, futuram  
putes? Eamne rationem sequare, qua tecum  
ipse & cum tuis utare, profiteri autem &  
in medium proferre non audeas? At vero  
illa, qui Peripatetici, quæ Stoici dicunt, sem-  
per tibi in ore sunt, in judiciis, in senatu,  
officium, aequitatem, dignitatem, fidem, rectitatem,  
honestam, dignam imperio, dignam populo Roma-  
no, omnia pericula pro republica, mori pro  
77 patria. Hæc cum loqueris, nos barones stu-  
pemus; tu videlicet tecum ipse rides. nam  
inter ista tam magnifica verba tamque præ-

clara, non habet ullum voluptas locum, non modo illa, quam in motu esse dicitis, quam omnes urbani, rustici, omnes, inquam, qui Latine loquuntur, voluptatem vocant; sed ne hæc quidem stabilis, quam, præter vos, nemo appellat voluptatem. Vide, ne non 24  
debeas verbis nostris uti, sententiis tuis. Quod si vultum tibi, si incessum fingeres, quo gravior viderere, non essemus tui similis: verba tu fingas, & ea dicas, quæ non sentias, aut etiam, ut vestitum, sic sententiam habeas aliam domesticam, aliam forensem, ut in fronte ostentatio sit, intus veritas occultetur? Vide, quæso, rectumne sit. mihi quidem eæ veræ videntur opiniones, quæ honestæ, quæ laudabiles, quæ gloriofæ, quæ in senatu, quæ apud populum, quæ in omni coetu concilioque proferendæ sint; ne id non pudeat sentire, quod pudeat dicere.

Amicitiæ vero locus ubi esse potest, aut 78  
quis amicus esse cuiquam, quem non ipsum amet propter ipsum? Quid autem est amare, e quo nomen ductum amicitiæ est, nisi velle bonis aliquem affici quam maximis, etiam si ad se ex iis nihil redeat? Et quidem prodest, inquis, mihi eo esse animo. Immo videri fortasse. esse enim, nisi eris,

non potes. qui autem esse poteris, nisi te  
amor ipse cuperit? quod non, subducta uti-  
litatis ratione, effici solet, sed ipsum a se  
oritur; & sua sponte nascitur. At enim se-  
quor utilitatem. Manebit ergo amicitia tam  
diu, quam diu sequetur utilitas; &, si uti-  
79 litas amicitiam constituet, tollet eadem. Sed  
quid ages tandem, si utilitas ab amicitia (ut  
fit s̄epe) defecerit? relinquens? quae ista  
amicitia est? retinebis? qui convenit? quid  
enim de amicitia statueris, vides. Ne in  
odium veniam, si amicum destitero tueri.  
Primum cur ista res digna odio est, nisi quod  
est turpis? Quod si, ne quo incommodo af-  
ficiare, non relinquens amicum; tamen, ne  
sine fructu alligatus sis, ut moriatur, opta-  
bis. Quod si non modo utilitatem tibi nul-  
lam afferet, sed jacturæ rei familiaris erunt  
faciundæ, labores suscipiendi, adeundum vi-  
tæ periculum; ne tum quidem te respicies,  
& cogitabis sibi quemque natum esse & suis  
voluptatibus? vadem te ad mortem tyran-  
no dabis pro amico, ut Pythagoreus ille fe-  
cit Siculo tyranno? aut Pylades cum sis,  
dices te esse Orestem, ut moriare pro ami-  
co? aut, si es Orestes, Pyladem refelle-  
res, te indicares? &, si id non probares,

quo minus ambo una necaremini, non pre-  
carere? Faceres tu quidem, Torquate, hæc 25  
omnia. nihil enim arbitror magna laude di- 80  
gnum, quod te prætermissurum credam aut  
mortis aut doloris metu. Non quæritur au-  
tem, quid naturæ tuæ consentaneum sit, sed  
quid disciplinæ. ratio ista, quam defendis;  
præcepta, quæ didicisti, quæ probas, fundi-  
tus evertunt amicitiam: quamvis eam Epi-  
curus, ut facit, in cœlum efferat laudibus.  
At coluit ipse amicitias. Quasi quis illum  
neget & bonum virum, & comem, & hu-  
manum fuisse. de ingenio ejus in his dispu-  
tationibus, non de moribus quæritur. Sit  
ista in Græcorum levitate perversitas, qui  
maledictis infectantur eos, a quibus de ve-  
ritate dissentunt. Sed quamvis comis in  
amicitiis tuendis fuerit, tamen, si hæc vera  
sunt, (nihil enim affirmo,) non satis acu-  
tus fuit. At multis se probavit; & quidem 81  
jure fortasse: sed tamen non gravissimum  
est testimonium multitudinis. in omni enim  
arte, vel studio, vel quavis scientia, ut in  
ipsa virtute, optimum quidque rarissimum.  
Ac mihi quidem, quod & ipse bonus vir  
fuit, & multi Epicurei fuerunt, & hodie  
sunt, & in amiciis fideles, & in omni vita

constantes, & graves, nec voluptate, sed officio consilia moderantes, hoc videtur major vis honestatis, & minor voluptatis. ita enim vivunt quidam, ut eorum vita refellatur oratio. atque ut ceteri existimantur dicere melius, quam facere; sic hi mihi vi-

**26** dentur facere melius, quam dicere. Sed 82 hæc nihil sane ad rem. illa videamus, quæ a te de amicitia dicta sunt. e quibus unum mihi videbar ab ipso Epicuro dictum cognoscere: amicitiam a voluptate non posse dividelli, ob eamque rem colendam esse, quod sine ea tuto & sine metu vivi non posset, nec jucunde quidem posset. Satis est ad hoc responsum. attulisti aliud humanius horum recentiorum, nunquam dictum ab ipso illo, quod sciam: primo utilitatis causa amicum expeti: cum autem usus accessisset, tum ipsum amari propter se, etiam omissa spe voluptatis. Hoc etsi multis modis reprehendi potest, tamen accipio quod dant. mihi enim satis est, ipsis non satis. nam aliquando posse recte fieri dicunt, nulla exspectata nec quæ-  
83 sita voluptate. Posuisti etiam, dicere alios, fœdus quoddam inter se facere sapientes, ut quemadmodum sint in se ipsos animati, eodem modo sint erga amicos: id & fieri posse,

& saepe esse factum, & ad voluptates percipiendas maxime pertinere. Hoc fœdus facere si potuerunt, faciant etiam illud, ut æquitatem, modestiam, virtutes omnes per se ipsas gratis diligent. At vero si fructibus, & emolumentis, & utilitatibus amicitias colimus, si nulla caritas erit, quæ faciat amicitiam ipsam sua sponte, vi sua, ex se & propter se expetendam; dubium est, quin fundos & insulas amicis anteponamus? Li 84  
cet hic rursus ea commemores, quæ optimis verbis ab Epicuro de laudibus amicitiae dicta sunt; non quæro, quid dicat, sed quid convenienter possit rationi & sententiae suæ dicere. Utilitatis causa amicitia est quæsita. num igitur utiliorem tibi hunc Triarium putas esse posse, quam tua sint Puteolis granaria? collige omnia, quæ soletis: præfidium amicorum. Satis est tibi in te, satis in legibus, satis & in mediocribus amicitiis præfidi: jam contemni non poteris. odium autem & invidiam facile vitabis. ad eas enim res ab Epicuro præcepta dantur. & tamen tantis vectigalibus ad liberalitatem utens, etiam sine hac Pyladea amicitia, multorum te benevolentia præclare & tuebere, & munies. At quicum joca, seria, ut dicitur, qui 85

cum arcana, quicum occulta omnia? Tecum optime: deinde etiam cum mediocri amico. Sed fac ista esse non inopportuna: quid ad utilitatem tantæ pecuniæ? Vides igitur, si amicitiam sua caritate metiare, nihil esse præstantius: fin emolumento, summas familiaritates prædiorum pretiosorum mercede superari. Me igitur ipsum ames oportet, non mea, si veri amici futuri sumus. Sed in rebus apertissimis nimium longi sumus. perfecto enim & concluso, neque virtutibus, neque amicitiis usquam locum esse, si ad voluptatem omnia referantur; nihil præterea magnopere dicendum. Attamen, ne cui loco non videatur esse responsum, pauca etiam nunc dicam ad reliquam orationem tuam.

36 Quoniam igitur omnis summa philosophiæ ad beate vivendum refertur, idque unum expertentes homines se ad hoc studium contulerunt: beate autem vivere alii in alio, vos in voluptate ponitis, item contra, omnem infelicitatem in dolore: id primum videamus, beate vivere vestrum quale sit. Atque hoc dabitis, ut opinor, si modo sit aliquid, esse beatum, id oportere totum poni in potestate sapientis. Nam, si amitti vita beata potest, beata esse non potest. Quis enim con-

fudit semper sibi illud stabile & firmum per-  
mansurum, quod fragile & eaducum sit? Qui  
autem diffidet perpetuitati bonorum suorum,  
timeat necesse est, ne aliquando, amissis il-  
lis, sit miser. Beatus autem esse in maxima-  
rum rerum timore nemo potest.

Nemo igitur esse beatus potest. neque<sup>87</sup>.  
enim in aliqua parte, sed in perpetuitate tem-  
poris vita beata dici solet; neque appellatur  
omnino vita beata, nisi perfecta atque ab-  
soluta; nec potest quisquam alias beatus esse,  
alias miser. Qui enim existimat posse se mi-  
serum esse, beatus non erit. nam cum semel  
est suscepta beata vita, tam permanet, quam  
ipsa illa effectrix beatæ vitæ, sapientia; ne-  
que exspectat ultimum tempus ætatis: quod  
Croeso scribit Herodotus præceptum a Solo-  
ne. At enim, quemadmodum tute dicebas,  
negat Epicurus diuturnitatem quidem tem-  
poris ad beate vivendum aliquid afferre, nec  
minorem voluptatem percipi in brevitate  
temporis, quam, si illa sit sempiterna. Hæc<sup>88</sup>  
dicuntur inconstantissime. cum enim sum-  
mum bonum in voluptate ponat, negat in-  
finito tempore ætatis voluptatem fieri ma-  
jorem, quam finito atque modico. Qui bo-  
num omne in virtute ponit, is potest dicere,

perfici beatam vitam perfectione virtutis. negat enim summo bono afferre incrementum diem. Qui autem voluptate vitam effici beatam putabit, qui sibi is conveniet, si negabit, voluptatem crescere longinquitate? igitur ne dolorem quidem. An dolor longissimus quisque miserrimus: voluptatem non optabiliorem diuturnitas facit? Quid est igitur; cur ita semper deum appellet Epicurus beatum *& aeternum?* Demta enim aeternitate nihilo beatior Jupiter, quam Epicurus. uterque enim summo bono fruitur, id est, voluptate. At enim hic etiam dolore. At eum nihili facit. ait enim se, si uratur, *Quam hoc suave!* dicturum. Qua igitur re a deo vincitur, si aeternitate non vincitur? in quo quid est boni praeter summam voluptatem, & eam sempiternam? Quid ergo attinet gloriose loqui, nisi constanter loquare? in voluptate corporis (addam, si vis, animi, dum ea ipsa, ut vultis, sit quod & in corpore) sicutum est vivere beate. Quid? istam voluptatem perpetuam quis potest praestare sapienti? nam quibus rebus efficiuntur voluptates, haec non sunt in potestate sapientis. non enim in ipsa sapientia positum est beatum esse, sed in iis rebus, quas sapientia comparat ad volu-

voluptatem. Totum autem id externum; &, quod externum, id in casu est. Ita fit beatæ vitæ domina fortuna: quam Epicurus ait *exiguam intervenire sapienti.*

Age, inquies, ista parva sunt. *sapientem* 28  
*locupletat ipsa natura;* cuius divitias Epicu- 90  
rus parabiles esse docuit. Hæc bene dicun-  
tur; nec ego repugno; sed inter se ipsa pu-  
gnant. Negat enim tenuissimo victu, id est,  
contemptissimis escis & potionibus, minorem  
voluptatem percipi, quam rebus exquisitissi-  
mis ad epulandum. Huic ego, si negaret  
quidquam interesse ad beatè vivendum, qua-  
li uteretur victu, concederem: laudarem  
etiam: verum enim diceret; idque Socratem,  
qui voluptatem nullo loco numerat, audio  
dicentem, *cibi condimentum esse famem, po-*  
*tionis sitim.* Sed qui, ad voluptatem omnia  
referens, vivit, ut Gallonius, loquitur ut  
Frugi ille Piso, non audio. nec enim eum,  
quod sentiat, dicere existimo. Naturales 91  
divitias dixit parabiles esse, quod parvo esset  
natura contenta. certe, nisi voluptatem tan-  
ti aestimaretis. *Non minor,* inquit, *voluptas*  
*percipitur ex vilissimis rebus, quam ex pre-*  
*tiosissimis.* Hoc est non modo cor non habe-  
re, sed ne palatum quidem. Qui enim vo-

Opp. Phil. T. I.

Q

luptatem ipsam contemnunt, iis licet dicere, se acipenserem menæ anteponere. Cui vero in voluptate summum bonum est, huic omnia sensu, non ratione, sunt judicanda; eaque dicenda optima, quæ sint suavissima.

92. Verum esto: consequatur summas voluptates, non modo parvo, sed per me nihil, si potest: sit voluptas non minor in nasturtio illo, quo vesci Persas esse solitos scribit Xenophon, quam in Syracusanis memfis, quæ a Platone graviter vituperantur: sit, inquam, tam facilis, quam vultis, voluptatis comparatio: quid de dolore dicimus? cuius tanta tormenta sunt, ut in his beata vita, si modo dolor summum malum est, esse non possit. Ipse enim Metrodorus, pæne alter Epicurus, beatum esse describit his fere verbis: *cum corpus bene constitutum sit, & sit exploratum, ita futurum.* An id exploratum cuiquam potest esse, quo modo sese habiturum sit corpus, non dico ad annum, sed ad vesperam? dolor igitur, id est, summum malum, metuetur semper, etiam si non aderit. jam enim adesse poterit. Qui potest igitur habitare in beata vita summi mali metus? Traditur, inquit, ab Epicuro ratio negligendi doloris.

93 Jam ipsum absurdum, maximum malum negli-

gi. sed quæ tandem ista ratio est? Maximus dolor, inquit, brevis est. Primum, quid tu dicas, breve? deinde dolorem quem maximum? quid enim? summus dolor plures dies manere non potest? vide ne etiam menses. nisi forte eum dicis, qui simulatque arripuit, interficit. quis istum dolorem timet? Illum mallem levares, quo optimum atque humannissimum virum, Cn. Octavium, M. F. familiarem meum, confici vidi; nec vero semel, nec ad breve tempus, sed & saepe plane, & diu. quos ille, dii immortales! cum omnes artus ardere viderentur, cruciatus perferebat? nec tamen miser esse, quia summum id malum non erat: tantummodo labiosus videbatur. at miser, si in vitiosa & flagitiosa vita afflueret voluptatibus. Quod 29 autem magnum dolorem brevem, longin- 94 quum levem esse dicitis; id non intelligo, quale sit. video enim & magnos & eosdem bene longinquos dolores: quorum alia toleratio est verior; qua uti vos non potestis, qui honestatem ipsam per se non amatis. Fortitudinis quædam præcepta sunt, ac pæne leges, quæ effeminari virum vetant in dolore. quamobrem turpe putandum est, non dico dolere (nam id quidem est interdum necesse)

sed faxum illud Lemnium clamore Philoctetæ funestare:

*Quod ejulatu, questu, gemitu, fremitibus  
Resonando mutum, flebiles voces refert.*

Huic Epicurus comparet se, si potest:

*Cui viperino morfu venaæ viscerum  
Veneno imbutae taetros cruciatus cident.*

Sit Epicurus Philocteta: *Si gravis dolor,*  
95 *brevis.* At jam decimum annum in spelunca jacet.

*Si longus, levis.* dat enim intervalla & relaxat. Primum non sæpe: deinde quæ est ista relaxatio, cum & præteriti doloris memoria recens est; & futuri atque impendentis torquet timor? Moriatur, inquit. Fortasse id optimum, sed ubi illud, *Plus semper voluptatis?* si enim ita est; vide ne facinus facias, cum mori suadeas. Potius ergo illa dicantur, turpe esse viro debilitari, dolore frangi, succumbere. nam ista vestra, *Si gravis, brevis; si longus, levis,* dictata sunt. virtutis, magnitudinis animi, patientæ, fortitudinis fomentis dolor mitigari solet.

30 *Audi, ne longe abeam, moriens*  
96 *quid dicat Epicurus; & intellige, facta ejus*  
*cum dictis discrepare.* EPICURUS HERMACHO S. *Cum ageremus, inquit, vitae beatum & eundem supremum diem, scribeba-*

mus haec, tanti autem morbi aderant vesicae & viscerum, ut nihil ad eorum magnitudinem posset accedere. Ecce miserum hominem, si dolor summum malum est. dici aliter non potest. sed andiamus ipsum: Compensabatur tamen, inquit, cum his omnibus animi laetitia, quam capiebam memoria rationum inventorumque nostrorum. sed tu, ut dignum est tua erga me & erga philosophiam voluntate, ab adolescentulo suscepta, fac ut Metrodori tueare liberos. Non ego jam Epaminondæ,<sup>97</sup> non Leonidæ mortem hujus morti antepono: quorum alter cum vicisset Lacedæmonios apud Mantineam, simulque ipse gravi vulnere exanimari se videret; ut primum dispexit, quæsivit, salvusne esset clypeus? cum salvum esse flentes sui respondissent; rogavit, essentne fusi hostes? cumque id quoque, ut cupiebat, andivisset, evelli jussit eam, qua erat transfixus, hastam. ita multo sanguine profuso in lætitia & in victoria est mortuus. Leonidas autem, rex Lacedæmoniorum, se in Thermopylis, trecentosque eos, quos eduxerat Sparta, cum esset proposita aut fuga turpis, aut gloria mors, opposuit hostibus. Præclaræ mortes sunt imperatoriaæ. philosophi autem in suis lectulis plerumque mo-

98 riuntur. Refert tamen, quod sibi videtur esse morienti magna laus. Compensabatur, inquit, cum summis doloribus laetitia. Audio equidem philosophi vocem, Epicure. sed, quid tibi dicendum sit, oblitus es. primum enim, si vera sunt ea, quorum recordatione te gaudere dicis, hoc est, si vera sunt tua scripta & inventa, gaudere non potes. nihil enim jam habes, quod ad corpus referas. Est autem a te semper dictum, nec gaudere quemquam, nisi propter corpus; nec dolere. Praeteritis, inquit, gaudeo. Quibusnam praeteritis? si ad corpus pertinentibus; rationes tuas te video compensare cum istis doloribus, non memoriam corpore perceptarum voluptatum. Si autem ad animum; falsum est, quod negas animi ullum esse gaudium, 99 quod non referatur ad corpus. Cur deinde Metrodori liberos commendas? quid ex isto tuo egregio officio & tanta fide (sic enim existimo) ad corpus refers?

31 Huc & illuc, Torquate, vos versetis licet: nihil in hac præclara epistola scriptum ab Epicuro congruens & conveniens decretis ejus reperietis. ita redarguitur ipse a se, veneuntque scripta ejus probitate ipsius ac moribus. nam ista commendatio puerorum,

memoria & caritas amicitiae, summorum officiorum in extremo spiritu conservatio, indicat innatam esse homini probitatem gratuitam, non invitatam voluptatibus, nec præmiorum mercedibus evocatam. Quod enim testimonium majus quærimus, quæ honesta & recta sint, ipsa esse optabilia per se, cum videamus tanta officia morientis? Sed, ut 100 epistolam laudandam arbitror eam, quam modo totidem fere verbis interpretatus sum: (quamquam ea cum summa ejus philosophi nullo modo congruebat:) sic ejusdem testamentum non solum a philosophi gravitate, sed etiam ab ipsius sententia judico discrepare. Scripsit enim, & multis sæpe verbis, & breviter apteque, in eo libro, quem modo nominavi, mortem nihil ad nos pertinere. quod enim dissolutum sit, id esse sine sensu; quod autem sine sensu sit, id nihil omnino ad nos pertinere. Hoc ipsum eleganter poni meliusque potuit. nam quod ita positum est, quod dissolutum sit, id esse sine sensu, id ejusmodi est, ut non satis plane dicat, quid sit dissolutum. Sed tamen intelli- 101 go, quid velit. quæro autem, quid sit, quod cum dissolutione, id est, morte, sensus omnis extinguitur; & cum reliqui nihil sit omni-

no, quod pertineat ad nos; tam accurate tamque diligenter caveat & fanciat, ut *Amynomachus* & *Timocrates*, heredes sui, de *Hermachi* sententia dent, quod satis sit, ad diem agendum natalem suum quotannis, mense *Gamelione*: itemque omnibus mensibus, vicesimo die lunae, dent ad eorum epulas, qui una secum philosophati sint, ut & sui & *Metrodorari* memoria colatur. Hæc ego non possum dicere, non esse hominis & belli & humani; sapientis vero nullo modo, physici præsertim, quem se ille vult, putare ullum esse cujusquam diem natalem. Quid? verene potest esse dies saepius, qui semel fuit? certe non potest. an ejusmodi? ne id quidem, nisi cum multa annorum intercesserint millia, ut omnium siderum eodem, unde profecta sint, fiat ad unum tempus reversio. nullus est igitur cujusquam dies natalis. At habetur. Et ego id scilicet nesciebam. sed, ut fit, etiamne post mortem coletur, idque testamento cavebit is, qui vobis quasi oraculum ediderit, nihil ad nos pertinere post mortem? Hæc non erunt ejus, qui innumerabiles mundos infinitasque regiones, quarum nulla esset ora, nulla extremitas, mente peragravisset. numquid tale Democritus? ut alios omittam, hunc appello, quem ille unum secutus

est. Quod si dies notandus fuit, eumne potius, quo natus, an eum, quo sapiens factus est? Non potuit, inquies, fieri sapiens, nisi natus esset, & isto modo ne si avia quidem ejus nata non esset. Res tota, Torquate, non doctorum hominum, velle post mortem epulis celebrari memoriam sui nominis. quos quidem dies quemadmodum agatis, & in quantam hominum facetorum urbanitatem incurratis, non dico. Nihil opus est litibus. tantum dico, magis fruſſe vestrum agere Epicuri diem natalem, quam illius, testamento cavere, ut ageretur.

Sed, ut ad propositum revertamur, (de dolore enim cum diceremus, ad istam epistolam delati sumus) nunc totum illud concludi sic licet. Qui in summo malo est, istum, cum in eo est, non est beatus. sapiens autem semper beatus est, & aliquando in dolore. non est igitur summum malum dolor. Jam illud quale tandem est? *Bona praeterita non effluere sapienti, mala meminisse non oportere.* Primum in nostrane potestate est, quid meminerimus? Themistocles quidem, cum ei Simonides, aut quis aliis artem memoriae polliceretur, *Oblivionis*, inquit, mallem. nam memini etiam quae nolo, *oblivisci non possum*.

250 DE FINIB. BONOR. ET MALOR.

105 *quae volo.* Magno hic ingenio. sed res se tamen sic habet, ut nimis imperiosi philosophi sit, vetare meminisse. vide, ne ista sint Manliana vestra, aut majora etiam, si imperes, quod facere non possim. Quid, si etiam jucunda memoria est præteriorum malorum? ut proverbia nonnulla veriora sint, quam vestra dogmata. vulgo enim dicitur, *Fucundi aeti labores:* nec male Euripides; (concludam, si potero, Latine: Græcum enim hunc versum nostis omnes: )

*Suavis laborum est praeteritorum memoria.* Sed ad bona præterita redeamus. quae si a vobis talia dicerentur, qualibus C. Marius uti poterat, ut expulsus, egens, in palude demersus, tropæorum recordatione levaret dolorem suum; audirem, & plane probarem. Nec enim absolvī beata vita sapientis, nec ad exitum perduci poterit, si prima quæque, bene ab eo consulta atque facta, ipsius oblivione 106 obruentur. Sed vobis voluptatum perceptarum recordatio vitam beatam facit, & quidem corpore perceptarum. nam si quæ sunt aliæ, falsum est, omnes animi voluptates esse e corporis societate. Corporis autem voluptas si etiam præterita delectat, non intelligo, cur Aristoteles Sardanapali epigramma

tantopere derideat; in quo ille rex Affyriæ glorietur, se omnes secum libidinum voluptates abstulisse. Quod enim ne vivus quidem, inquit, dintius sentire poterat, quam dum fruebatur; quo modo id potuit mortuo permanere? Fluit igitur voluptas corporis, & prima quæque avolat, sæpiusque relinquit causas pœnitendi, quam recordandi; itaque beatior Africanus cum patria illo modo loquens,

*Define Roma tuos hostes - - -  
reliquaque præclare:*

*Namque tibi monumenta mei peperere labores.*

Laboribus hic præteritis gaudet; tu jubes voluptatibus: hic ad ea revocat, e quibus nihil unquam retulerat ad corpus; tu totus hæres in corpore.

Illud autem ipsum qui obtineri potest, quod 33  
dicitis, omnes animi & voluptates & dolores ad 107  
corporis voluptates & dolores pertinere? Ni-  
hilne te delectat unquam? video, quicum lo-  
quar. Te igitur, Torquate, ipsum per se nihil  
delectat? omitto dignitatem, honestatem, spe-  
ciem ipsam virtutum, de quibus ante dictum est:  
hæc leviora ponam: poema, orationem, cum  
aut scribis, aut legis; cum omnium factorum,  
cum regionum conqueris historiam; signum,

tabula, locus amoenus, ludi, venatio, villa  
Luculli, (nam si tuam dicerem, latebram  
haberes: ad corpus dices pertinere,) sed  
ea, quæ dixi, ad corpusne refers? an est  
aliquid, quod te sua sponte delectet? Aut  
pertinacissimus fueris, si in eo persistieris,  
ad corpus ea, quæ dixi, referri: aut dese-  
rueris totam Epicuri voluptatem, si negave-  
ris. Quod vero a te disputatum est, majo-  
res esse voluptates & dolores animi, quam  
corporis; quia trium temporum particeps  
animus fit, corpore autem præsentia solum  
sentiantur; quid? probari potest, ut is, qui  
propter me aliquid gaudeat, plus, quam ego  
ipse, gaudeat? Animi voluptas oritur propter  
voluptatem corporis, & major est animi vo-  
luptas, quam corporis. ita fit, ut gratula-  
tor lætior sit, quam is, cui gratuletur.  
Sed, dum efficere vultis beatum sapientem,  
cum maximas animo voluptates percipiatur,  
omnibusque partibus majores, quam corpo-  
re; quid occurrat, non videtis. animi enim  
quoque dolores percipiet omnibus partibus  
majores, quam corporis. ita miser fit aliquan-  
do necesse est is, quem vos beatum semper  
vultis esse. nec vero id, dum omnia ad vo-  
luptatem doloremque referetis, efficietis un-  
quam.

Quare aliud aliquid, Torquate, hominis 109  
summum bonum reperiendum est. Volupta-  
tem bestiis concedamus; quibus vos de sum-  
mo bono testibus uti soletis. Quid, si etiam  
bestiae multa faciunt, duce sua quæque na-  
tura, partim indulgenter, vel cum labore;  
ut in gignendo, in educando per facile appa-  
reat, aliud quiddam iis propositum, non vo-  
luptatem? partim cursu & peregrinatione  
lætantur: congregatione aliæ coetum quo-  
dam modo civitatis imitantur. Videmus in  
quodam volucrum genere nonnulla indicia  
pietatis, cognitionem, memoriam: in mul-  
tis etiam disciplinam. Ergo in bestiis erunt 110  
secreta a voluptate humanarum quædam si-  
mulacra virtutum; in ipsis hominibus virtus,  
nisi voluptatis causa, nulla erit? & homini,  
qui ceteris animantibus plurimum præstat,  
præcipua natura nihil datum esse dicemus?  
Nos vero, si quidem in voluptate sunt omnia, 34  
longe multumque superamur a bestiis: qui-  
bus ipsa terra fundit ex fese pastus varios,  
varieque abundantes, nihil laborantibus; no-  
bis autem aut vix, aut ne vix quidem, sup-  
petunt multo labore quærentibus. nec tamen  
ullo modo summum pecudis bonum & homi-  
nis idem mihi videri potest. Quid enim tan-

to opus est instrumento in optimis artibus  
comparandis, quid tanto concursu honestissi-  
morum studiorum, tanto virtutum comita-  
tu, si ea nullam ad aliam rem, nisi ad volu-  
112 ptatem conquiruntur? Ut, si Xerxes, cum  
tantis classibus, tantisque equestribus & pe-  
destribus copiis, Hellesponte juncto, Athone  
perfozzo, maria ambulavisset, terramque na-  
vigasset, si, cum tanto impetu in Græciam  
venisset, causam ejus quis ex eo quæreret  
tantarum copiarum, tantique belli, mel se  
auferre ex Hymetto voluisse diceret, certe  
sine causa videretur tanta conatus: sic nos  
sapientem, plurimis & gravissimis artibus  
atque virtutibus instructum & ornatum, non,  
ut illum, maria pedibus peragrandem, clas-  
sibus montes, sed omne cœlum totamque cum  
universo mari terram mente complexum, vo-  
luptatem petere si dicemus, mellis causa di-  
113 cemus tanta molitum. Ad altiora quædam,  
& magnificentiora, mihi crede, Torquate,  
nati sumus: nec id ex animi solum partibus,  
in quibus inest memoria rerum innumerabi-  
lium, vitæ quidem infinita; inest conjectura  
consequentium, non multum a divinatione  
differens; inest moderator cupiditatis, pudor;  
inest ad humanam societatem justitiae fida cu-

ftodia; inest in perpetiendis laboribus adeun-  
disque periculis firma & stabilis doloris mor-  
tisque contemtio. Ergo hæc in animis: tu  
autem eriam membra ipsa sensusque consi-  
dera: qui tibi, ut reliquæ corporis partes,  
non comites solum virtutum, sed ministri  
etiam videbuntur. Quid, si in ipso corpore 114  
multa voluptati præponenda sunt, ut vires,  
valetudo, velocitas, pulchritudo? quid tan-  
dem in animis censes? in quibus doctissimi  
illi veteres inesse quiddam cœleste & divinum  
putaverunt. Quod si esset in voluptate sum-  
mum bonum, (ut dicitis,) optabile esset, in  
voluptate maxima, nullo intervallo interje-  
cto, dies noctesque versari, cum omnes sensus  
dulcedine omni quasi perfusi moverentur. Quis  
est autem dignus nomine hominis, qui unum  
diem totum velit esse in isto genere volunta-  
tis? Cyrenaici quidem non recusant. vestri 115  
hæc verecundius; illi fortasse constantius.

Sed lustremus animo non has maximas  
artes, quibus qui carebant, inertes a majo-  
ribus nominabantur: sed quæro, num exi-  
stimes, non dico Homerum, Archilochum,  
Pindarum, sed Phidiam, Polycletum, Zeu-  
xin, ad voluptatem artes suas direxisse? Er-  
go opifex plus sibi proponet ad formarum,

quam civis excellens ad factorum pulchritudinem? Quæ autem est alia causa erroris tantum, tam longe lateque diffusi, nisi quod is, qui voluptatem summa bonum esse decernit, non cum ea parte animi, in qua inest ratio atque consilium, sed cum cupiditate, id est, cum animi levissima parte deliberat?

116 Quæro enim de te: si sunt dii, ut vos etiam putatis, qui possunt esse beati, cum voluptates corpore percipere non possint? aut si sine eo genere voluptatis beati sunt, cur similem

35 animi usum in sapiente esse nolitis? Lege laudationes, Torquate, non eorum, qui sunt ab Homero laudati, non Cyri, non Agesilai, non Aristidis, non Themistoclis, non Philippi, non Alexandri: lege nostrorum hominum, lege vestræ familij: neminem videbis ita laudatum, ut artifex callidus comparandarum voluptatum diceretur. Non elogia monumentorum id significant, velut hoc ad portam unicum: *Plurimae consentiunt gentes, populi primarium fuisse virum.* Idne con-

117 sisse de Calatino plurimas gentes arbitramur, primarium populi fuisse, quod præstantissimus fuisset in conficiendis voluptatibus? Ergo in iis adolescentibus bonam spem esse dicemus, & magnam indolem, quos suis com-

modis inservituros, & quidquid ipsis expe-  
diat facturos arbitramur? nonne videmus,  
quanta perturbatio rerum omnium consequa-  
tur? quanta confusio? tollitur beneficium;  
tollitur gratia; quæ sunt vincula concordie.  
Nec enim, si tuam ob causam cuiquam com-  
modes, beneficium illud habendum est, sed  
fœneratio, nec gratia deberi videtur ei, qui  
suam ob causam commodaverit. Maximas  
vero virtutes jacere omnes necesse est, vo-  
luptate dominante. Sunt enim turpitudines  
plurimæ, quæ, nisi honestas natura pluri-  
mum valeat, cur non cadant in sapientem,  
non est facile defendere. Ac, ne plura com- 118  
pletear (sunt enim innumerabilia) bene lau-  
data virtus voluptatis aditus intercludat ne-  
cessè est. quod jam a me exspectare noli. tute  
introspicere in mentem tuam ipse: eamque omni  
cogitatione pertractans, percontare ipse te, per-  
petuisne malis voluptatibus perfruens, in ea,  
quam sæpe usurpabas, tranquillitate degere  
omnem ætatem sine dolore; assumto etiam illo,  
quod vos quidem adjungere soletis, sed fieri  
non potest, sine doloris metu: an, cum de om-  
bus gentibus optime mererere, cum opem  
indigentibus salutemque ferres, vel Herculis  
perpetiærumnas. Sic enim majores nostri la-

bores non fugiendos, tristissimo tamen verbo  
119 etiam in deo nominaverunt. Exigerem ex  
te, cogeremque, ut responderes, nisi vere-  
rer, ne Herculem ipsum ea, quæ pro salu-  
te gentium summo labore gessisset, volunta-  
tis causa gessisse diceres.

Quæ cum dixisse, Habeo, inquit Tor-  
quatus, ad quos ista referam: &, quamquam  
aliquid ipse poteram, tamen invenire malo  
paratiores familiares nostros. Credo, Syro-  
nem dicis & Philodemum, cum optimos vi-  
ros, tum doctissimos homines. Recte, in-  
quit, intelligis. Age sane, inquam. sed erat  
æquius, Triarium aliquid de nostra diffen-  
sione judicare. Immo, inquit arridens, ini-  
quum, hac quidem de re. tu enim ista le-  
nius; hic Stoicorum more nos vexat. Tum  
Triarius, Posthac quidem, inquit, audacius.  
nam hæc ipsa mihi erunt in promtu, quæ  
modo audivi; nec ante aggrediar, quam te  
ab ipsis, quos dicis, instructum videro. Quæ  
cum essent dicta, finem fecimus & ambu-  
landi, & disputandi.

---